

呂
子
評
語

呂子評語正編卷十

論語述而第七

子曰述而不作章

述作本無低昂。述而不作。正爲理不當作耳。

信好二義相須。却是一齊都到。

信而好古。正是述字中實際。不分兩層。不作。實見得道理。如是不止是謙詞。如後人妄立宗旨。皆是無忌憚。敢作。其病只是不好古。不好由於不信。不信由於不知。故曰述者之謂明。又曰蓋有不知而作之者。

人多輕看了述字。便似聖人虛爲退遜之語。不知述字正難承當在。惟孔子能述堯舜禹湯文武周公。惟孟子能述孔子。惟程朱能述孔孟。其道同也。後人不能述程朱。便敢紛紛亂道。其病總

先從不信起。

趙衍文鑒知自私之士其患在於無傳而其端始於不信。病根只是一件。又一則信其所信非吾所謂信。今人聞舉陽明之失如聞父母之名而於程朱則短之不遺餘力何也。又一則信猶不信不可以爲信。今日風尚又一變篤信紫陽者某却不

敢輕許。

自信

信好爲述之本信又爲好之本理自不易。道釋

者流得一經一法便實信仙佛可成秀才讀聖賢書却只爲胡亂做文字騙科名計毫不信聖賢可做聖賢之言切已不謬也不信如何得好不好如何能述秀才中無人物其病正坐自不信聖人耳。信字又要從天理出來但憑心說信便入邪異傳習錄云學貴得之心求之於心而非也雖其言之出孔子不敢以爲是然則陽明心中之是非又在孔子心中是非上矣其無忌

憚敢亂道至此。孔子且不信。況其他乎。然近日亦有說程說朱者。又多是依傍時尚。爲標榜結納號名謀耳。敢道他原不曾信得及在。

今人好談經學。著作紛紛。靳駕勝於傳註。其實於四書白文。全然不懂。徒欲以欺世之無目者。共相稱歎。使聖人見之。其爲兩觀之誅。何逃也。

六經大旨。今已無晦。而爲經說者。必欲起而晦亂之。真可恨也。有友人遊返以遐方講學所著圖書曆數之辨見示。其說最淺陋可笑。而譎詆古昔。抑侮聖言。蠻村騷鄙。敢於無知妄作如此。皆世道人心之憂。無論其粗疎謬劣。卽一開口落筆。已知其不會讀過此節書來。可歎可哀。

子曰默而識之章

三者原非聖人之極至。觀不厭倦二句。夫子嘗以自謂可知。此所謂謙而又謙也。時解定將三者說向高玄。乃求深反淺耳。

艾南英曰。開天明道之事。古聖人創之。而卒未聞聖人之有所緣而起也。意者其有在語言文字之先者乎。**語**默識不是生知神悟。如此說。不覺皈依棒喝。默識註云。不言而存諸心。祇是沉潛體會。服膺勿失意。非不學而知之謂。故不言心解一說。朱子已明削之。至謂語言文字之先有見。則直墮異學窠窟矣。總因要說得三者過高。便有此病。或云。學不厭。卽智。教不倦。卽仁。仁智卽聖。不必泥註中非聖人極至之說。曰。不厭倦之爲智仁。是子貢因夫子自謙中推進一步語。看若聖與仁章自分明。若此二句是智仁極至。夫子豈遽自任乎。則可謂云爾已矣。其非聖人之極至可知。越平實。越自歆然。若不及。越見得聖人意思好。聖

人分量。不賴此處擡高。要擡高。正是自己見識低。不會聖意耳。請拈出則事公卿一節。如何擡高作聖人之極至耶。

以默識作旨。統下兩句。未爲不可。固不必定以三平爲不可移易也。但講默識多混入拈花微笑別傳。斯則大謬不然耳。

默識便是知止境界。

三句看來。默識似知止至善。學不厭似明明德。教不倦似新民。只默與不厭倦。見聖人渾然本分如此。看三句氣象如何。問註云。三者已非聖人之極至。恐不須如此恢張。曰。固是。然於此亦須見箇聖人。意中所見底模樣。定不小小。

上三句總要逼起末句。須不是夫子自狀。亦不是泛論其理。意中實有箇現成人在。

子之燕居章

寫得閒曠神奇。是誤贊聃墨法相。若收歸實地。又止得大賢以下。甲裏事。與聖人分上懸隔。黃浩翁能道光風霽月四字。故朱子稱其見處甚高。

凡形容氣象語最難。如所謂容舒色愉。自大賢以下。凡爲天姿和緩之人。未嘗無此光景。然非聖人之申申天天也。其間高下等級正多。所謂各家門前自有景致。憑各人舉看。只說得自家說話耳。須胸眼中實見一箇聖人全影始得。

摹擬出箇活的聖人固是難。摹擬他摹擬之詞又是難。

形容平人尚多不相肖。况形容聖人而欲得其容色之微乎。申申天天記者已屬擬似。千載下如何著筆。

都在向上一歩尋討。方見聖人分上事。張子三十年做不到也。須到此方知也。

子曰志於道章

道德仁藝公共名目工夫全在上半截。

四句總看。見兼該交養涵泳無間之妙。遞看。見先後輕重之義。各看。見用功得力親切不同處。

全解 聖儒或挾其一以藏身。以爲不可多取於名理。或統其一於混沌。以爲不必分驚於殊途。嗚呼。是烏知學問自然之理哉。**圖** 學者之病。不出此二者。而下一種尤害道。末語所見甚高。志據依游云云。須不是聖人強差排名色。

首節

志字內有知止義在。

志於道。卽大學所謂知止也。知之則志有定向。

依於仁節

日月至亦是依中事。但分久暫淺深耳。

文南英家語

此依張子韶也。子韶咏此句云。試看迷途一瞥矐。

若還無相豈能通。力行未到安身處。且可依他入箇中。然畢竟不合。爲其看依字淺也。莫若從註爲是。唐宋諸儒說經。未經朱子採取者。猶夏商周之書爲夫子刪去者。終不可傳耳。**語**自記已分明。然謂子韶看依字淺却不當其罪。他看得仁字不好耳。故云無相豈能通。他只將仁當箇瞽者之相。則所謂安身處者非仁矣。湛若水教人隨處體認天理。亦近似好話。然其所指之天理。乃子靜之黑腰子也。今欲破諸邪說。須先認取仁字端的。

游於藝節

游藝是徹上徹下事。所以終道德仁之後。

陳際泰文

一事不能爲儒者之所恥。云云。

語

便看得藝淺甚矣。如

此只成玩物喪志耳。

道德仁次第秩然定理。至於藝。輕視之。則初學之末節。若序在道德仁之後。則似反重矣。不知藝與道德仁較。則本末輕重固然。然本末自不相離。志據依之時。原脫藝不得。故藝與道德仁相爲終始。在初學肄習。則藝自粗淺。非藝粗淺。爲藝工夫粗淺也。至大成游養之藝。則又爲精微。非藝精微。爲藝工夫精微也。假如灑掃應對進退。游以爲小子之末。然到聖人動容周旋中禮。不過原是此末事。豈可以聖人之末。同於子夏門人之末乎。工夫到聖處。本原大段已定。這上面神妙。却正在末處。中庸所謂聖人有所不知不能者。不知不能。不礙其爲聖人。更知更能不。又加神妙乎。故游藝序在道德仁後。正自不輕。惟邪學一切以爲支離務外。故將藝看壞。他正不曉得游字境界。儘高也。

言言身一
游藝自初學至成德皆然。不可說依仁後方可及此。但至成德後
游處自不同耳。

游藝不坐煞在依仁後。志道據德時皆離藝不得。

朱子云。藝是小學工夫。論先後則藝爲先。三者爲後。論本末則三者爲本。藝爲末。習藝之功固在先。而游者從容潛玩之意。又當在後。又中子謂志道據德依仁而後藝可游也。此說自好玩。此一
條則游藝輕重先後之理盡矣。故上三句可次第遞說。而游
藝句不可坐煞在依仁後。與依仁相比屬。亦不可將此句另側
重。似反精妙於上三句也。

歸有光文
凡六藝之訓。先王之所以爲教。與之出入進退俯仰左
右。而優游於理趣之博。使之接於耳目。動於四體。而從容於日
用之際。則有以見夫道德性命之非內。而事物形器之非外。蓋

交養之功。如此其密也。**評**自金溪以來。總不曾明得此義。講章看得末句輕淺。亦坐此弊。

子曰自行束脩以上章

自行束脩以上。極言有來學者無不教之耳。非謂必待束脩也。沾沾於束脩著論可笑矣。

陳際泰云。吾以驗其誠焉。**評**此意便是。

子曰不憤不啟章

舉字中殺活縱奪作用具在。

是四隅中隨取一隅。故一卽是三。若坐煞一隅。則三在一外矣。

子謂顏淵曰。用之則行章

郭溶云。功名之故。取衷於道德。則已素。兵武之略。歸原於學問。則已優。居是世也。爲是事也。不問何途之操。聖賢處此。必有道耳。

圖到聖賢真無不可處之時地亦不分大小事理如是如是。首節之要在兩則字。行藏非聖賢所重。重所以行藏者。子路病處行藏皆有。非能行而不能藏也。

首節

用之則行兩句。須連讀合看。乃見聖人所謂有是之理。若謂聖賢總以濟世爲心意。重行一邊。不見聖賢全身。要大翻成小樣矣。惟我與爾句。語脉最難襯貼。著一點矜詡倣負之氣。便失聖人當下篤信實證。與指示行藏本領大意矣。

曾點暮春數句。亦是用則行舍則藏。但點只矜乍見得。不如顏子實有諸已耳。

子曰暴虎馮河節

雖說行軍所與。然必也二句。指平生大段言。不粘煞兵事。

必也者也。四字最活。如此人方可行軍。能懼能謀。見大本領。不泥定行軍說。

子行誰與。却不於行三軍時擇取也。說至此。仲氏之氣不得不奪。臨事二字。包舉甚大。聖賢豪傑。王佐儒將。都在此間安身立命。常人之懼。多在事中事後。須臨事早爲。

懼字精神。正與血氣之勇相反。是子路對針。

單講箇懼字。是聖賢主敬本領。此懼字却大。不是此處本分。此處懼字。貼定臨事說。單講不得。要之源頭。固自大懼字生來。見得此意。本分道理又高一格耳。

黃憲羅文士大夫之器之識。必有以超於一將之外。而後可退而爲將。**評**卓論。須知用之則行。本領自如是。**文**跳盪之姿。夷大難有餘。安一身不足。**評**夷大難亦未必有餘。**文**內力堅定者。恆先

天下而有周身之防。智略恢宏者。雖卽小事而有什全之慮。**文**孔明謹慎。在苟全二句。便可見。後世以粗疎不事細行爲豪傑大誤。**文**若斯人者。當其入爲周召。出爲方虎。則從容而兼文武之寄。至於弛兵解職。而奸雄無賊亂之謀。**文**曹操解兵就國。不得。可知是賊。**文**不幸萬方糾怒。九宇黨騰。則談笑以折敵人之衝。至於事定功成。而寬然有未施之智。**文**最善形容。學者胸中須常思此種氣象。**文**謀而後能成也。懼而後能謀也。**文**重在成此云。謀而後能成。却倒了。蓋臨事而懼。則無喜功輕事之心。好謀而成。則無粗疎潰裂之患。兩句本平說。都是子路對症之劑。懼字對成字。不對謀字。兩而字語勢注重分明。懼在幾先。成周事後。缺一不可。懼爲成謀之本。此又推論之說。非本題正面也。然於理却甚有發明。

成字兼決斷果遂之意。乃見全理。

謀時能審斷決中。固是成。謀後果毅周到。至事成萬全。正是成。陶菴先生文。只見得謀時一半。

人云。兵行詭道。純乎功利權詐。用得效時。便是道。故當以逆億術數爲主。此不知兵之言也。逆億術數。中處少。不中害事處多也。只是先覺無不勝。道德無不服耳。懼而好謀。原是先覺道德中事。非功利權詐之術也。

子曰。富而可求也。章

富而可求也。三句。是反跌語。激出下文。甚言不可求耳。

而字及如字。不是游移兩可之辭。大注蘇氏謂爲此語者。特以明其決不可求耳。是點醒語。不是婉商語。

如不可求。主命說爲是。若謂義不可求。如字口氣欠的。聖人言語。

每下一步以就人。正是決其不可意。

爲下等人。不得不如此說。

不可求。是受多少折磨後。方肯死心塌地。若尚留餘。猶不足使庸子轉省也。

如字神情。見心勞日拙。小人枉自做小人耳。然中道而迴車。及行迷之未遠。從一點醒後。卽能猛省勇改。便是聖賢豪傑矣。諸公得無意乎。

從字兼得失說。身分乃高。要之得亦是不可中事。

策蹇而應。不求聞達。陳狀而試高蹈丘園。其醜態更甚於馬頭籬下。

子在齊聞韶章

季札聞韶曰。觀止矣。夫子聞韶曰。不圖爲樂之至於斯也。兩者贊

歎雖同而境界自別。蓋季札是驟見崖岸驚喜之語。夫子是學
習既久深歎之詞。固不可同日語也。

冉有曰夫子爲衛君乎章

助輒之誤。賢者不免。當時亦皆看錯。國君社稷之重。此義之似是
而非者。故子貢須問。初問問其義。再問問其心。正子貢善問處。
若止是爭讓相較。子貢何須問得。唐之靈武。宋之臨安。何嘗非
國君社稷爲重之義耶。怨乎一問。直將從來借義名而助弑逆。
議論心事都誅盡。

陳子龍文說者謂衛輒爲君而迎蒯聵以奉之。此似是而不達於
勢也。夫國人悅輒而惡蒯久矣。假令讓以位而國人弗悅。徒以
虛名奉之。則父之圖子也不旋踵而徒爲天下笑。此說有疵。
輒不肖耳。輒果求仁。豈計讓後成敗利鈍哉。

後世俗儒胸中。只奈何這得失利害成敗不下。只在這上面計較裝扮。故聖人之道終不可行。看聖人此章。直提出箇仁字。則要知於極難處置處。定有箇處置之道。只在求仁上體會自得。那得失利害成敗之計較裝扮。自無由發端也。

論語載此章。微旨正在下一節問答義理精妙。其所關已不止衛國一事。父子一倫也。而所以定衛案者。已自明盡。

入曰伯夷叔齊何人也。節

怨字。正要從興盡氣平後看出。

怨乎。是直究隱微。乃子貢善問處。蓋於此際不能無少遺憾。則天理尚未得其正。人心尚未得其安。而當日衛事。猶未可援以爲斷例也。

夷齊當下只是自盡。使得乎天理之正人心之安而已。若夷去管

齊。齊又管夷。夷齊又管中子。則粘帶回顧。私意起而怨從此生矣。

陳心之仁可必得者也。關於事勢之仁不可必得者也。仁在全天倫。與仁在全父命。與仁在全宗社。將一而處焉。而二子知所去取矣。故二子而無中子。有中子而不必賢。有中子之賢而不必立。則伯夷窮而叔齊尤窮。卽得仁且怨。以非得其所求之仁。故怨也。**程**果別有去取。出於天理之正。是亦求仁得仁耳。夫何窮。且夷齊所行之外。別有仁可得。則夷齊之所求者非仁矣。惟其心止在天倫而毫不繫乎國。故曰求仁而得仁。如此文計較。仍是從國起見矣。得仁者。得其天倫心理之安。非得國家事勢之全也。總之論理從事勢利害言。便與仁字相違背也。不爲子貢本不待問而決。所以問者。欲求此理之極處。至幾微無

憾耳。至印證明徹。更釋然無疑。

上文之問。子貢自質疑端。此句直斷夫子之意。所問非所斷。所斷非所問。正見子貢善問善斷處。

子曰飯蔬食飲水章

傳云云。此節須先領會箇樂字。朱子云。此樂與貧富自不相干。故謂樂貧者直頭不是。其次云樂道近似矣。然程子云。使顏子以道爲樂。則非顏子矣。朱子解之謂道與我非二物。但熟後便自樂也。其次又以貧富不累其心爲樂者。此却是倒說。朱子云。胸中自有樂。故貧富不累其心。不是將那不累其心底做樂。玩此數條。則樂字可會。處川見處未的。於諸病雜犯不少。嘗云。王濟之官至一品。富擬王侯。乃自稱家徒壁立。吾無隔日儲。文字中着一貧字不得。殆不可曉。其沾沾得意。亦止斬勝於

王濟之已耶。

又曰。聖人者。樂天而忘物者也。樂天也。隔在。有其樂而樂天。貧富只一般。中間無不如意。若謂聖人處貧而樂。以富貴不如貧賤。故無所慕乎外。則聖門如原憲。亦可以其有此樂矣。何必孔顏哉。只爲後世談道者。自己胸次俗下。不知至道。只與世間貪穢垢濁一流。比較高低。稍勝於彼。便自謂迴越。又將聖人放低來。湊自己。謂聖人不過如是。不知聖人分際。煞是不可窺躋。孔顏所樂。千古少人到手。故欲反照此章之義。須從原憲之介。巢許之逸。老莊之放。都不是此樂。觀出正面。又從不改其樂。與樂亦在其中。同是此樂。觀出聖人更上一層。方得真實了義。若將富貴貧賤。較量彼此。以一班流俗腥膻肺肝。與聖人比並是非高下。直是不識好惡也。

程子謂不是樂道。又云所以樂者仁而已。或疑道與仁何辨。朱子曰。不是樂仁。惟仁故能樂爾。明此意。可知樂道樂仁。未嘗害理。却是樂在道與仁外。惟道與我一。故樂心與仁一。故樂到得自。有其樂時。已不知其爲道爲仁也。故樂字註脚。莫如孟子所性。二節極分明。到根心生色。不言而喻處。是何胸次。學者試嘗思。此氣象來。

亦在其中。與不改其樂境界自殊。所樂則一。曰不改。則非樂陋巷簞瓢也。曰亦在。則非樂疏水曲肱也。亦在得解。橫說豎說都是。翫如浮雲三字。不是夷然處之而不驚。亦不是介然逃避而力拒。須想聖人當此時處置當如何。纔見得箇如浮雲真相。

聖人未嘗惡富貴而樂貧。所浮雲者不義之富貴耳。

子曰加我數年章

章世純文明於天之道而於人有餘察矣。此可易言也哉。䷋不是
天道便難。人事便易。人事卽天道也。䷋易以道陰陽而道貴其
中。用處其正。以中貴陰陽。而陰陽已不能齊也。三畫之卦。中一
而過與不及居其二。六畫之卦。中二而過與不及居其四。如是
而天下之爲中者亦已難矣。以正律陰陽。而陰陽時相詭也。當
位者有矣而已。有重剛重柔之患。不當位固矣。而又有所應所
乘之差。如是而天下之爲正者亦又難矣。䷋提出中正二義。可
見一部易象都從過處生來。觀象玩占而知過所以然之理。卽
可以無大過之道也。亦惟聖人能深明其故耳。䷋在易得失之
說皆繫以吉凶。人卽輕於是非之際。而莫不懼於吉凶之間。以
吉凶深明乎得失是非。故其道可以喻於愚民。而本之陰陽以
爲端者。在神聖又可深求而不盡也。䷋易中得失是非自見。但

易主卜筮。故以吉凶言多耳。非以此動愚民也。

若將易只在吉凶禍福上看。只此一點意旨。便與易理與聖人學易之理。千里萬里。

子所雅言章

此言聖人尋常言語之間。引據辨說。大約不出此耳。不是日提此三經爲課程也。

是記者久而見得。指出示人。非夫子懸經立教也。

不是聖人以此立教。亦不是偶然道及。須看記者熟之平日參之同人。悟得聖言大都不離近是雅。情景義旨乃得。

此題寫聖人意思不得。聖人原未嘗立定齋課。頒列經義。如近日講堂規式也。全是記者親炙習傳日久。覺得聖言不離乎此。看首末二句。記者指數神理。唱歎不盡。皆在所字皆字得之。

聖人初不會立箇綱宗。謂言必軌於此。在聞言者亦隨人隨時。受教而退。未嘗總聚同參。如後來語錄公案也。記者日久熟會得如此筆之於書。令後人領會聖人教人全身。其意無窮。是記者留心總記語。亦是記者悟出聖人用處。皆雅言句。記者亦無限意思。

首喝一句。末又複繳一句。中間列數一句。純是記者會通從前語言。從中指點綱宗出來。與學者做思議。

子曰我非生而知之者章

我字句讀斷。兩者字自相照應。非字與也字相照應。

此章我字與多學而識章予字同例。最重要先將此字懸起一箇現成。孔子在前。而後分別出我之爲我。不是那樣。是這樣。做成底故。兩者字緊與我字相應也。字緊與非字相應。若果寫好古。

敏求神理失矣。

人因兩者字遂將兩句作兩項人。然細思生而知之固有此一等名號。若好古敏以求之。乃夫子自述其平生與學而知之等不同。不可作大家名號看。

此是夫子自辨其向來得力。從見成地位說。不講以後工夫。

或謂下句不宜說做求知。亦不須如此說。看註首句云不待學而知。則下句爲學而知。於理亦無害。我字兩之字自相應。大段與子貢一貫章予字之字相似。都在聖人所得學問言。原主知一邊耳。

謂求之不當竟作求知。恐添礙語氣是也。然所謂求之。正云我之所以知者。乃好古敏求而得之者耳。知有生知。有學知。困知。聖人辭生字而居好敏耳。未嘗辭知而居求也。爲避求知而反添

出不居知。同爲添礙。然求知之礙在語句。不居知之礙在道理矣。聖門功夫最重知。如何不居。

生而知之。其知幾何。故必學以廣之。生知神明不測。豈無幾何之知耶。但是生知聖人也。廢不得好古敏求。此是孔子實狀。却在自已口中難下。孔子說生知。是極尊崇不可思議之人。故曰我非。今將生知自已說輕。便失其理。且如其言。乃良知非生知也。

謂夫子自已放低一步引人。是聖人打誑語也。謂夫子實止好古敏求。又是矮漢觀劇之論。如夫子之好古敏求。乃其所以爲生知。猶爲誨不厭倦之正唯聖仁也。

實是生知。實是好古敏求。此聖人全體也。只恐人推委生知。不肯去好古敏求。此聖人至教也。須體會此兩重。

聖人實是生知。實是好古敏求。實不自以爲生知。實不自知其好古敏求之出於生知也。旣自言其得力。亦卽以此誘人。一片深情難畫。

論正面原是聖人自明以勉人。尹氏又從勉人推轉聖人本分說。故列在圈外。

夫子實自不以爲生知。若異端論學。多不知不覺說入生知去。大約喜直捷簡易。畏義理之艱。便致如此。如朱子謂陸子靜學知以下一切都廢。是也。

子曰三人行章

三人行。人字中有我在。

人是極微。三人是極少。三人行是極暫。愈說得人字微。下師字便透。愈說得三人少。下兩其字便透。愈說得三人行是暫。下擇字

從字改字便透

此師字。正要看得極活。一必字。觸處遇之。

聖賢學問。仰有掇。俯有拾。隨處皆有所取益。今世謹愿之士。深居支戶。不肯見一箇不好人。不知接遇不善。亦儘有鍛鍊處。講聖賢道理。尚有掩却一半。必不肯看一部不好書。不知辨析羣言。亦儘有受益處。凡此只緣有箇我在。正要兩邊辨別完全耳。此言無地無取益之處。其善者。卽就三人中彼兩人分別。必有彼善於此者。故善字極活。非全體至善之謂也。

子曰天生德於予章

天生此德於予。自無死桓魋之理。只在生德上看。非謂天生德後。又必保護此德也。旣生後。天更無保護處。但雖不保護。必無此死法。夫子亦只在德上信得真耳。

子曰二三子以我爲隱乎章

二三子疑團從過求高遠來過求高遠從實地少工夫來。

子以四教章

此與雅言章皆門人習久共悟而舉其大要如此亦門人身心所得耳目所有聖人固未嘗立此條規課程也。

此與雅言章皆要放下一步看聖人越見得聖人無行不與下學上達之妙。

四者只是孔門學規聖人造就之妙有不盡此者然亦不離此也。四者於衆人看則有材質科分之不同於一人看則有時候次第之不一。

玉庭文忠其所自盡也。內以盡己故無所私於己。外以盡物故無所靳於物。信其所不欺也。內不以欺心故無二三於心。外不以

欺人故無巧詐於人。忠信二字最易混。看他分別處。各兼內
外說更好。

四教直達至處。徹上徹下。

戴曾伯講義云。著書滿家。發言成理。談於僚友者。難以質於臧獲。
號於鄉閭者。難以合於閭門。古人沿其一而可通其四。今人一
不成而四有餘喪。以視近之俗學偽學。不更可憫痛乎。

子曰聖人吾不得而見之矣。章

首二節

斯可矣三字。原不是慰幸。亦不是絕望。

錢禮安善人懿行也。天既善矣。尤以人而成其天焉。質既善矣。又
以行而佐其質焉。分疏善人確。若但言質美。何至不得而見。
亡而爲有節。

亡而爲有一流人儼然自附於聖人而不疑。君子善人皆非所屑居也。後世講學者動以聖人自處。且以生知第一等事教人。蓋聖人早憂之矣。

子釣而不綱章

子曰釣而不綱。章綱。非仁術也。**註**正是仁術。和尚放生會戒殺文。却是不仁。**○**天地之大。且以殺道行秋冬。殺固天地所倡矣。聖人不欲求高於天地。與分過焉耳。**○**天地以殺道行秋冬。本是至理。釣弋正聖人奉若輔相處。如云分過。不但不明聖道。并無忌憚於天地。

仁者天地之心。若無聖人之道。主張其間。天地之仁亦行不去。故曰與天地參。揆文教。奮武衛。弧矢之利。皆仁也。放蛇蟲。飼虎豹。不仁之甚者。釣弋固仁術也。綱與射宿。則太過而爲不仁。故聖

人無是爾。

子曰蓋有不知而作之者章

此是夫子示人以學知之法不但辭闕妄作一流并謝却生知一位。

不知而作當下便罪大不論後弊。

多聞二句所以然道理及聖人用功處甚精目爲支離務外者固非只作博聞強識者亦淺。

識字中具有分寸不是強記也。

拳拳非失識字中有功力。

多聞二句是聖人實歷次字謙詞不是泛論求知之道。

歸有光文卽物以窮理由象以識心而吾良知之不蔽者可以有

覺矣詳良知所重在不學慮與此各一話頭况如此言乃姚江

之良知。非孟子之良知也。

子曰：「仁遠乎哉？」

此節爲放而不求反以爲遠者言。當下指點他轉來反求耳。不是求仁無工夫。未說到工夫處也。

遠字原爲陷溺後一種人謂之。

金 **文** 計一日之間。晝爲夜息。居處與人精神之微。逐而莫能以自淡者。何限也。**評** 聖學之仁。却不離此上說。**文** 我誠解一念之縛。達觀乎天地。無有如吾仁之大也。**評** 我欲仁。不是此境界。**文** 誠欲之。我此時卽不敢謂宿習俱捐。浮氣俱盡。而我之耳目聞見。已別有天地矣。**評** 此是說踴處。不是說盡處。幹補得好。然他所下語。却純是禪。須辨取似是而非。**文** 誠欲之。我此時卽不敢謂聖賢無功。任道無程。而我之俯仰出入。已杳無身世矣。**評** 亦

不論工夫。幹補得更好。在禪家便是更須保任。仁之爲學也。來不知其所自。往不知其所歸。雖志仁之堅。非必能專其力以守吾仁也。可知正有工夫在。雪嶠亦云。悟道易。得道難。似此語句。真令人莫辨。等而上之。有依焉而弗去。則欲之極而無欲者也。無仁可至也。上而不復見欲至。則是却不可謂無欲。無仁可至此。語病不小。遠不遠。吾亦不能解其所以然也。欲仁者自驗之矣。繳轉乎哉。指點意好在。慧能亦云。密在汝邊。○通節大旨。爲遠字辨論。只在反求當下指示。不論前後際。不論工夫。不論火候。到不到。查滓淨不淨。覷透此意。真說得精靈警動。然他所言只是禪。與聖學迥別。蓋指示反求機法相同。而其所反求之本領則異。此所謂彌近理而愈失真者也。不近不足。以惑賢智。試從吾細批抹處思之。自見。

若謂此心纔提卽在此。只說得心。未可言仁也。上蔡以知覺訓仁。病亦坐此。後來學術毫釐之差。皆始於此。仁者心之德。心只是虛靈不昧。故能藏仁。非虛靈不昧卽仁也。惟其虛靈不昧爲最活之物。故有人心道心之分。仁者道心也。欲仁卽道心之動處。故曰欲仁仁至。

此欲字是虛字。只訓要字耳。人每混入理欲字看。實做不特理謬。直文不通矣。

陳司敗問昭公知禮乎章

首節

昭公原有知禮之名。故司敗疑問。

孔子退節

揖巫馬期以下神情。俱從上退字接出。孔子不多一言。亦不許司

敗多一言默然而退。司敗一肚皮不合時宜。無處發泄。逢人便如孔子。急欲發泄出來。不必定是巫馬期也。實有此一段迫不能待神情。

黨只在言論上說。指議論扶同徇私而言。

吳孟子三字中有昭公之謂。有國人之謂。孟子二字。昭公以愚人者。國人因其愚而愚之。上加一吳字。昭公固不得而罪之。而聞者絕倒矣。此一時情事想當然。

昭公只以孟子二字諱人耳。如經傳中孟子聲子之類。未有書國者。昭公豈反自加吳字。作此處無銀計耶。

玩君而知禮而字。司敗意僅以不知禮日昭公爲猶輕也。

章世純文云云。**文十子**國語一段。司空季子逢君之惡。附會其說以要懷羸耳。大力奈何信之。據以入文。雖百世不通。自周人始。

然黃帝爲姬。炎帝爲姜。是同胞兄弟可通婚姻也。四母之子。別爲十二姓。是同父異母兄弟。可通婚姻也。無稽之談。聖門所不道。**註**古書中說數害道者甚多。不可憑以立論。使竇倫內亂。而曰亦猶行古之道也。非其說之罪乎。艾評甚有裨於世道。

子與人歌而善章

此章須從聖人全體想像其妙。古人謂鄉黨一篇。正是聖人樣子。亦是此意。若坐煞歌上。與鏤冰畫脂等矣。

因小見大。看聖人於一細事。全體皆現。故此題不妨推演盡量。只患不肖聖人模樣耳。

只此一細事。而聖人成已成物。德性問學之美。有不可勝求者。會得此意。卽在歌中已見全體大用。不會時。儘他鋪張拈轉。寫得記者沒意思。聖人小家數也。

而善而字。自活相。不曾有所專指。

因其善。故使再歌。欲得其詳耳。非謂反之而歌乃善也。

附此章文

天高地下。萬物散殊。善流行於其間。無所往而不與人遇也。顧遇
恒人則善日見少。而遇聖人則善日見多。何則。聖人之心精。斯
其入之也深。故一善而衆善出焉。聖人之心虛。斯其感之也全。
故小善而大善備焉。聖人之心誠。斯其出之也敬。慎而周密。故
一事之善而德性尊焉。聖人之心和。斯其接之也易。直而安詳。
故一時之善而氣象備焉。聖人之心公。斯其及之也廣大。而不
遺。故天下之善而一人受焉。一人之善而天下受焉。於何見之。
於子與人歌見之。名卿贈禽而賦雅頌之章。猶存拜賡規諫之
義。問里謳吟而來倡和之什。不失采風問俗之心。此有取乎歌。

也。子與人歌。子亦猶是也。或言短而意彌長。述者之所感。爲作者之所未傳。或情深而聲彌淡。聽者之所悟。爲歌者之所未覺。此有取乎歌之善也。子與人歌而善。子亦猶是也。而子之心。則已與善相深矣。忽而聞焉。欲其善之與我洽也。聲輟而善隨逸焉。則彼之曲折未盡出也。夫所謂曲折者。人能之。人未卽解之。子解之。子又未卽能之。如是而人之善隱。子之善亦隱矣。必使反之。則人所能者亦解焉。子所解者亦能焉。而曲折乃盡出也。而子之心。則已與善相發矣。漸而卽焉。喜其善之與我親也。理得而善斯秘焉。則我之吟域未盡化也。夫所謂吟域者。人有之。子未嘗無之。子有之。人安得有之。如是而人之善微。子之善亦微矣。而後和之。則人所有者固有焉。人所無者亦有焉。而吟域乃盡化也。然則一歌也。而聖心之精且深也。如此其虛而感之。

大也如此其誠敬周密也如此其和易而安詳也如此其公而無可私廣大而不遺也如此此可爲天下取善之法矣善之來也無端其往也亦無端寂然而生我無以留之則竟謝焉矣我不欲謝之則亦竟留焉矣其中至賾其外至庸無心者不能取而有心者取之聖人所以有窮理格物之學也此可爲天下與善之則矣善之大也無量其細也亦無量紛然而至以一人盡之而已盡於一人矣不以一人盡之而并盡乎天下矣其用萬殊其體一本有心者不能與而無心者與之聖人所以有存神過化之功也

子日文莫吾猶人也章

解有文言以明道而發之成章者謂之文**譯**文卽言也得此疏解尤明**文**能文之士方馳騁於浮華支詞漫衍而世皆求工其

所已至云云。**評**韓柳歐蘇諸公皆不出此言。其餘尚未能及此耳。

韓歐亦止是爲文章。帶得幾分道理耳。况其他詞章之陋者乎。文字照註作言爲的。

躬行君子四字。圖圖不拆。固不可講。做君子躬行。亦不是躬行之君子。蓋君子二字。是指君子之道。非美其人而予之名也。

君子二字。是言所行之則。作實理看。非稱美之號也。故謝氏謂猶言君子道者三。我無能焉。朱子謂與君子之道四丘未能一焉之意同。當作躬行君子之道講。四字圖圖出。

全文今天下所不足豈文哉。非不澤一世之耳目。使反而問焉。而不必有益於吾之身。亦自關古今之問學。然舉而措之。而或不能無疑於其所行。**評**文人名士。下梢全無把鼻。如是如是。**文**

天生聖賢之意。期有以獨貴而立於世之所不足。使敝敝焉爲衆人之所公爲。則亦衆人焉已矣。如此說却是虛僞之氣。聖人所謂躬行君子。意極平實。况躬行亦衆所公者。但不肯耳。雖不尚文而躬行未盡。亦不得爲君子。

文行相須。原無偏廢之理。夫子正只患奪志耳。

此節語味有重有輕。有疑有信。有曲有直。却只是一氣轉注。

文原只是講所以躬行之理。只爲學文人便將來但作說話說了。程子所以譏其玩物喪志也。爲如此。若子以四教。卻是文作第一件。弟子行有餘力。則以學文。朱子謂不學文。則所失不止於固陋而已。又何嘗不重文也。近世學者。恐文章之士易走作。遂至以學文爲禁。而所取率皆鄙瑣不脛不脛之物。卽有一二拘謹之士。下梢亦無展拓。只爲此章書看得不融貫。將文行打作

兩楹便生出多少病痛耳。

後儒易惑於異學也。只爲他說來頗似聖言。大略如聖人說文行緩急。他便道文字支離。知行合一。亦似重行之義。不知他輕文便欲不立語言文字。非聖人輕文本意。他重行。只要行他所見。非聖人所重之行也。看聖人躬行下急著箇君子。便有箇篤信好學。聖賢準則在。他卻說效先覺之所爲。亦是專求諸外。直敢道求之吾心而非。雖言之出於孔子。不敢信以爲是。然則其所重之行。決與聖賢異矣。故離君子而說躬行。行字便沒著落。以此知聖人之言。字字切實。不可易也。

後來異端立說。亦似輕文重行。然所行實非君子之道。朱子謂他只要踐履他的說耳。

子曰若聖與仁章

夫子雖不居聖仁之名。然觀其所言。正已得聖仁之實。此是公西華意中語。若謂夫子自己維度。辭其名而居其實。則是聖人假謙虛打誑語矣。

抑字轉。是夫子自有安身立命處。不是徒謙讓未遑。讓第一等事與別人做也。之字卽指聖仁而言。爲字煞有實際。不厭須從爲之看出。蓋惟爲乃易生厭也。

爲之謂爲聖仁。脫却聖仁。空講爲字者。非也。

或謂爲誨不宜根定聖仁。不知阿誰不通學究。敢如此亂道。註中明白說爲之謂爲聖仁之道。誨人亦謂以此教人。汝曹偏不曾見何也。總是正學不明。皆務爲圓通而惡切實。故其弊至此。弟子不能正指不厭倦而言。若爲誨則大家日用分內。孔門弟子舍此更有何事。如何不能耶。

不厭倦。正是夫子之聖仁處。公西所以說不能學。不能學。只指不厭倦爲是。

子疾病子路請禱章

子曰丘之禱久矣。卽此見禱之有理。卽此見禱之無益。卽此見聖人之敬天持身。旦明不失其辭氣之間。如春水方至。百川灌河。絕澗枯槩。無不充溢。古人云學者最要識得聖賢氣象。試從理會來。

子曰奢則不孫章

儉字尚從禮中出來。儉非卽固也。儉則固耳。其間有漸積有流弊。如晏子一狐裘三十年。可謂之儉。然君子作法於儉。其失則固。故禮不可不慎也。今有家累巨萬。而慢薄行乎骨肉。苛刻及乎里閭。作法於鄙。無所不至矣。那得援此三字以自文乎。

子曰君子坦蕩蕩章

註中循理二字。是坦蕩蕩真本領。卽所謂本天者也。若只向心上尋坦蕩蕩氣象。到得晉人說老莊止矣。

分別出曠達一流。方見君子真相。

坦字不應與蕩蕩分對。

坦蕩蕩三字直下。言坦然無適而不寬廣也。故坦字只在蕩蕩二字上看。有以平寬相對。則坦與蕩蕩分兩義矣。下長戚戚又作何解。故知坦字當與長字相照會也。

陳龍文君子之得志也。布公於時。推誠於衆。而小人之得志也。矯情欺世。常懷他日之虞。**語**小人之長戚戚。亦不專防人禍。此章言君子小人心體之不同。雖處窮達險夷。獨居與衆。寂靜感動時。無不然者。非獨指用人禦世也。**文**以率直之性。而當陰相

伺察之人。則君子必敗。小人必勝。臣君子神明通達。變化不居。而其體自平曠。今日君子必敗。不敵小人。則是以坦蕩蕩爲大。呆子也。豈其然乎。

子溫而厲章

下半句只完上一字。不是兩件德美。

厲與不猛與安。正是形容溫威恭圓相。而字是併合語。非轉換語。只做溫威恭之妙極是。若做六件支對。誤矣。

是記者形容聖人未嘗自知其然。此意亦人所共知。但於自然中看出聖人自有工夫主宰處。有積厚自流處。乃爲有學問之言。

呂子評語正編卷十一

論語泰伯第八

子曰泰伯其可謂至德也已矣章

論語兩至德。正當參看。

論文王至德。便譏武王非聖人。論泰伯至德。便要周全太王。不曾
翦商。連此章註語。亦老大不以爲然。此正後儒滿肚皮後世私
心。不可與論聖人也。三代以前。原無謀取天下之事。無論聖人
如太王武王。卽當時庸衆諸侯。曾有謀取天下不成而事敗伏
誅者乎。固不必以此疑太王也。翦商二字。是就周家功德人材
與太王作爲規模而言。三代聖人。皆以天命人心爲重。有天下
爲輕。行一不義。殺一不辜。而得天下。皆所不爲。太王武王同也。
得百里之地。皆足以朝諸侯有天下。泰伯之所同。而泰伯不爲。

此泰伯之所以爲至德也。故太王翦商。武王伐紂。與後世取天下心腸。天懸地隔。豈儒先看得翦商伐紂。與後世取天下無異。故朱子與陳同甫論漢唐之君。不可以接三代。寧可千年架漏。正爲此也。若謂太王遷岐在小乙之世。高宗復興者六十年。不可謂衰。此皆後世取天下議論也。殷之衰也。始於雍已而興於太戊。至仲丁外壬復衰。而再興於祖乙。至南庚復衰。而三興於盤庚。小辛復衰。而四興於武丁。至祖庚祖甲。一衰不可復矣。此商家興衰始末也。然則太王遷岐之時。商已四衰矣。武丁雖賢。僅足以支六十年。周家積功累仁。其興勃焉。天命人心之際。聖如太王。有不知之者乎。且古之興衰。論德不論勢。德盛而歸之者多。則爲興。德失而歸之者少。則爲衰。又王三分有二。原是紂之天下。未嘗割據而有也。然則太

而人歸其爲翦商何

疑善乎朱子之言曰。泰伯之心。卽夷齊之心。天地之常經也。太
王之心。卽武王之心。古今之通義也。聖人未嘗說一邊不是。須
見得二者並行而不相悖。乃善。此義非特今之庸儒不知。其誤
實始於元儒。仁山又得之王魯齋。魯齋求其說而不得。
則曰。朱子用古註未及改也。及語錄與註脗合。則仁山又曰。語
錄出門人所記。恐不足以證集註。嗚呼。朱子之學之失傳。豈待
今日哉。

金聲文事固有出聖人之獨見。而未一一明言者。千載後誠不必
臆爲說而反以舛。**詩經**左傳。不是千載後臆說翻案者自成
舛耳。**文**太王遷岐九十年。而文王始生。季當是時。固未始有神
聖之胤也。**此**金仁山說。要之未有文。看太王王季氣局也。定
翦商矣。**文**承父志於幾先。不憚飄然長往。則季之賢旣無以加

於伯而傳幼全屬私愛。古公肇基王迹，必不懷此敗法亂紀之心也。**評**此之謂以庸腹度聖人。太王翦商，不是謀叛，傳幼亦非私愛。伯與季亦不在賢否，只志業不同耳。**文**夫子知其微而却侯封，乃曰天下勾吳一往，乃曰三讓。**評**可知天下二字如何。在聖人必有以稱之，而吾與今之人皆民也。當時既不知夫子復不言，又安以庸夫之腹度聖人，以千百載下橫臆千百載前，曉曉焉爲之說也哉。**評**正謂有不民者，其說可信。正希自信不及一槩作民觀耳。**文**况稱其子而寃其父，漫爲太王翦商之說乎。**評**翦商是周人頌其祖之詞，決非寃也。○君臣之義，原爲天下而有。太王爲天下而翦商，武王爲天下而伐紂，泰伯爲天下而讓位，王季爲天下而受命，其義一也。故詩曰：帝作邦作對，自泰伯王季。維此王季，因心則友，則友其兄，則篤其慶，載錫之光。

受祿無喪。奄有四方。作邦作對。而曰自泰伯。則泰伯之宜有天
下可知。稱王季則曰友兄。錫光受祿。言承泰伯之意。能篤周之
慶而受天命。以彰其知人之明。爲讓德之光。則翦商亦泰伯所
遣也。泰伯自不欲爲。且見王季之足以有爲。故三讓以自全耳。
朱子謂太王欲立賢子聖孫。爲其道足以濟天下。非有愛憎利
欲之私也。故泰伯去之不爲狷。王季受之不爲貪。又謂論其志
則文王固高於武王。而泰伯所處又高於文王。論其事則泰伯
王季文武皆處聖人之不得已。而泰伯尤表裏無憾。又謂二者
須見得道並行而不相悖。乃善。合此數條觀之。足以見集註之
無疑。金仁山不明此義。自以其人欲之心胸。妄疑古聖人之大
義與後世取天下並論。不知此中正相反。太王翦商。子孫以此
頌其祖而不爲嫌。豈數百年中。聖君賢相名卿學士。無一人知

脩飾訂正之。而待今日爲之幹旋洗刷乎。蓋事出天理。本無可諱避也。若莽操之篡奪。必以功德禪讓自文。今欲爲太王去翦商之名。是以莽操見識看太王也。乃反議集註未改正文中所云以庸夫之腹度聖人而與今之人皆民者也。豈足與讀集註哉。

伯夷叩馬。武王伐商。俱是聖人天理極至上事。太王原非陰謀。只是辭不得。泰伯原非謂商不可翦。只是自不欲承當。兩者本自合轍。說壞一邊。固非。周旋兩邊。亦非也。孟子謂伯夷伊尹孔子得百里之地而君之。皆能朝諸侯有天下。如俗儒言。則凡聖人得百里而君。卽非朝廷之福。卽非至德。不則孟子之言諄矣。王魯齋金仁山皆不識此理。

泰伯於古今之通議。天地之常經。實見得並行而不相悖。但這邊

事自有人承當。自己斟酌。却須如是乃安。而行之。又極盡其
所以爲至德。若泰伯原只見得一邊道理。又何須云以天下讓
耶。

父子君臣其義一也。惟泰伯不能兩全。所以爲難。

一去而君臣父子二義皆安。方見至德。老生偏主讓商讓周者。皆
誤見得一邊耳。

三讓則讓之誠。以天下則讓之大。而又隱晦其迹。非有爲名之累。
所以爲至。逃父文身。本非正理。必須行權。乃爲得中。故曰處君
臣父子之變。此變字。言禮之變。非變故之變也。

泰伯之於君臣父子。皆是變而不失其常。至德要從此看出。

聖人之德之至。皆是從變處看出。蓋人之處變。每易有不盡分處。
而能變而不失其權。此聖人之所以爲至德也。太王之翦商。固

古今之通義而泰伯之不從。又天地之常經所謂卽夷齊卽馬之心而難處有甚焉者。時文只寫得泰伯曲意彌縫。僅存註中泯其迹三字。不見此義。則其與許務臧札相去幾何。鄙儒眼如針孔。固未足與論此也。

無得而稱。不是民之不能稱泰伯。亦不是泰伯不使民稱。只是其行甚高。所謂知我其天也。其迹又泯。所謂蕩蕩無名也。民雖欲舉一端以頌之。不可得耳。

泰伯在武丁時。卽早知天命去留。此其所以無得而稱。而德極其至也。

民並不得而稱其讓。蓋讓亦是夫子推論耳。

子曰恭而無禮則勞章

章世純文。君子審於禮云云。此言四者皆德行之美。而無禮以

節之則有是弊耳。非言由禮而生恭慎勇直也。且恭字義猶近之下三句。又如何例說得去。

陳隱公以禮之制於世也。先王恐其繁難之故。乃於議禮之中。逆計人之所易行而受之以簡。**評**禮自有繁者。繁亦不勞。勞非繁難之謂。恭而有禮。亦非簡之謂。大禮必簡。言禮之大者多簡耳。非禮主於簡也。**評**禮之行於世也。先王恐有愁苦之端。乃於行禮之外。陰飲人之所樂就而私之以和。**評**禮如何有愁苦之外。陰私數字尤謬。先王並無此意。禮之用和爲貴。亦言禮中自然之道。非禮外另有和之作用也。此二比流入晉人之旨。與禮意正相悖。恭而無禮。多卑諂意態。非繁難嚴苦之謂也。

曾子有疾。孟敬子問之。章

君子所貴乎道者三節

對定執政大夫講。非取門而濶綽也。首言君子所貴。下言則有司存。正爲孟敬子箴規。移向他人不得。

三者脩身之要。爲爲政之本。動正出正。有工夫。斯遠斯近。乃得其所以止耳。未動正出之前。有居敬涵養。臨動正出之際。有慎獨省察。此脩身之本於誠正也。曾子平生本領如此。

斯字合下便須如此。所以可貴。其根本全在存養精熟。乃能得此。須從斯字矣。字極輕快。口氣中討出極邃密原頭。

斯字從君子體貼出來。工夫在動正出前。

陳際泰

一容貌。物來求我之所動矣。斯必遠暴慢而後可焉。云。

云。都說向外去。非曾氏旨也。斯字如此說。似只致飾不至於暴慢不信鄙倍而已矣。斯字必宜如此。存此以正俗解之謬。以生安之質之不易幾者。責諸俗吏。聖賢而不近人情。乃

爾乎。○戚說非也。朱子曰。斯字來得甚緊。斯遠暴慢。猶云使遠暴慢。又云。道之所以可貴。惟是動容貌。自然便會遠暴慢。正顏色。自然便會近於信。出辭氣。自然便會遠鄙倍。所以貴乎道者。此也。蓋所以能一動正出而自然便會者。皆操存省察無造次顛沛之違所致。非生安之質之所謂自然也。曾子舉箇現成樣子。謂君子必須如此。所貴二字。卽勉敬子以此三者。操存省察平時以此涵養。臨事以此持守。亦非以生安之不易幾者責俗吏也。只將君子所貴乎道者三一句重看。卽得其旨矣。

斯矣二字。正見可貴。須知有半部大學格致誠正脩平日用力工夫在。

辭氣之氣。卽指言語之聲音神韻。若云辭本於氣。此氣字則養氣之氣。有大小本末之不同。况此兩字並聯。亦不得橫生出側重。

氣字之說

鄙是鄙。倍是倍。不可蒙混。得出辭氣之道。則鄙倍自遠。雖易近鄙。處倍處。都不鄙。不信。

曾子曰。以能問於不能。章

純乎無我。聖人也。尚有人我一間在。顏子也。

以能問於不能。二句。就學問上說。有若無二句。就器量上說。能多中階級無窮。

顏子之不校。渾然無非天理。晉人情恕理遣。總是私心。唐人唾面自乾。一發世情狡猾矣。

從空中畫出一箇顏子。須知顏子意中。原不曾有此數句也。硬擬議入陋巷中行狀。便是覷面千里。

曾子曰。可以託六尺之孤。章

兩可以在平時看。

君百里易寄百里之命。則上下左右事事有所嫌疑。周召尚有不相信處。可見難。

當留則留。當去則去。去亦是不可奪。

末二句承上三句一總說。兼才節爲是。輕才重節。曾子並無此意。與字也字。只反復稱歎以決之耳。

自萬曆以前宰輔以相傾軋爲一局。萬曆末年以後以調停私傳衣鉢護持爲一局。至啓禎間則兼此二惡爲一局。總以奪人爲巧而已。亦易奪。然其所奪者不過祿位耳。何大節之有。

曾子曰士不可以不弘毅章

弘毅所以爲仁也。而弘毅之體卽仁也。不仁不能爲弘毅也。兩邊看得融洽工夫本體事爲方無一不透。

弘毅原從仁出不弘毅正是仁虧欠處

秀才先不識仁字。枉讀四書識得仁字。則士者仁之具也。弘毅仁之用也。任仁之事也。道仁之運也。七穿八洞何處不見此理。

首節

四方上下曰宇。往古來今日宙。宇宙在吾分內。仁也。宇宙不是兩件事。故弘毅二字一滾說。拆開不得。第二句而字。是側串。非平對也。

毅不在長久看。在長久中暫處短處看。乃精嚴。

看本節。似上句虛。下句實。看下文。則下句之虛。更虛於上句。

仁以爲已任節

仁字略逗。重讀。落以爲已任。下句神理自見。若作以仁爲已任。或以已任仁。便失語氣。蓋此四句申明重遠不解說弘毅也。

子曰興於詩章

是興於詩不是詩可興此中原有功力在但章意只就現成說耳此三於字與志道章於字相似而實不同彼於字是著力字粘上一字讀此於字是指點字粘下一字讀蓋彼在工夫言此在功、效言但將興立成三字逗斷思之便見

今人亦知要從興立成說起而不得其意只辦字眼先後見耳說來仍與詩禮樂說起者無異若爲求興立成而後去尋詩禮樂則意理淺薄不見三於字之妙矣須一向在詩禮樂做工夫已而悟得興立成在此三於字之味乃出

古者教人從小便以歌詩習禮樂爲事直至老死不輟故能使人志意得廣筋骸強固耳目聰明血氣和平移風易俗天下皆寧此是甚氣象甚功用其爲興立成皆不知其然而然此其所以

妙也。

此章道箇經學便可笑。夫子時何曾有六經之稱哉。

詩禮樂是古者教人躬行口習之事。非如後世士失其教。無其事。而但從書本記誦也。看程子古成材。易今成材。難一段可見三代以後人材之卑在此。三代之終不可復。亦在此。如徒以經而已。則今日詩禮樂之經。何嘗不存乎。故此章說經學。經教便錯。詩禮樂只是人心與立成本量。原不是聖人強人心所無而爲之說。

有問胡雲峰云。無程子之說。後世不知成材之難。無真氏之說。真以人材爲難矣。詩禮樂皆非吾心外物也。其說如何。曰。程子之說。見處極高。功用極大。三代以上聖人之道也。西山之說是就三代不可復以下。設箇無聊方便法門耳。然充其義。則必至無。

詩禮樂亦得矣。不知能得詩禮樂之本。卽無詩禮樂亦能興立。成。此必大賢以上幾之。豈可槩之中人以下哉。三代聖人教人。必內外交養。本末全備。其爲道也。自聖人至中人以下。皆不可廢。故其時人材。及治平氣象。與後世人材氣象。天懸地隔。此有詩禮樂之興立。成與無詩禮樂而強爲興立。成。原自迥乎不同也。繇程子之言。使後有王者。必將講求三代教人之法。庶幾聖人之道得行。若雲峰之言。則吾心自有詩禮樂。不必外求。使王者何以陶鑄人材。興起教化哉。要其弊不出異端俗學二種。凡以此章爲經學者。俗學之見也。彼看詩禮樂固自輕淺。以爲心學者。異端之見也。彼亦看得詩禮樂輕淺。然俗學之輕淺。猶不敢畔道。若異端之輕淺。則敢於無忌憚矣。蓋詩禮樂本天興立。成本心。必心本於天。乃能成材合道。若謂吾心自有興立。成。吾

心自有詩禮樂卽以心爲天矣。時文多用胡氏說作賓意。雖轉合正義。然其意卽流露輕淺。詩禮樂之見不可不察也。

黃淳耀改爲學之煩且勞。莫甚於古也。而有中人之性者。皆可底於成。爲學之簡且逸。莫甚於今也。而有傑出之才者。不免卽於廢。則以性情耳目之間。古人之爲養者密。而今人之爲養者疎也。**註**三代以上。人材易成。成來亦遠。勝後世。其故盡此。

子曰民可使由之章

民者對士大夫以上而言。但將民字位分畫清。則可不可之故瞭然矣。先王教民。只重行教。士大夫以上却重知。同在庠序學校中。而由者爲民。能知者卽士大夫以上。民之分量只得如此。其中稍有聰明者。先王卽舉而用之矣。

科目秀才。誰其知之者乎。而況民乎。

可使不可使。有只在民資質上說者。有只在聖王設教上說者。然惟民之資質如此。故聖王之設教亦然。偏靠一邊不得。

由與知有兩事。兩之字原只一理。可使不可使。有兩層。原只一條心。

兩之字只是一理。知卽是由中所以然之故。若看做兩件。便是有所隱謾也。

可使不可使。說作兩句。便非。其實只是一句耳。

由者必要如此。知不知則存乎其人。

使由處。聖人正用全副精神。所知之理已盡在其中。固非別有欺瞞。亦非斷然不許明白也。

不可使。不是不許知。知固聖王所喜也。

不可使。原是要他知。及其知。原上是上所使。如此看。乃圓徹。

可字只訓能字。便的稍或深解。鶻突。直以聖言爲老莊申商狙詐之祖矣。

可字訓能字。此是民自天生如此。非聖人有意於其間。纔有意便是使。纔使知便害事。強不知以爲知。究竟無知者。正是不能使知也。

子曰好勇疾貧章

好勇疾貧。兩者有其一。皆足以造亂。缺其一。不足以速亂。

勇與貧非亂也。好之疾之。乃亂耳。然勇自生好。貧自生疾。則仍是兩者爲之。季代之失天下。多乃如之人爲之也。嗚呼。是誰之咎與。

史記一書。好勇疾貧之書也。其流爲蘇氏父子。降至羅貫中演義而極。近代亂原。皆出於此。學者不可以不辨。

子曰如有周公之才之美章

意中才字極輕言下周公之才極重。

陳賡

云云

此章大意甚言驕客之不可耳。不關才事。若謂

有才者不可驕客。豈無才者不妨驕客乎。蓋緣天下驕客之病。大約生於小有才者。故夫子以才立說。云即使才美。即使才美如周公。若一驕客。則其本已壞。其才直餘事。何足觀哉。況乎才未必美。美未必如周公。何以驕客爲也。周公二字。從才美二字。偶然引帶。並不關周公名位事業也。況可因周公而泛及大臣論乎。

驕客生於才。無才則何驕客之有。韓子所云傲雖凶德。必有恃而後行。謝上蔡所謂去箇矜字不得者也。然世間驕客之人。儘有不必有才者。但當責其驕客。不當醜其無才。假令有才而即可

以寬假驕客之罪。則於周公之才之美。當何如耶。細玩如有使字虛神。則抑揚之間得矣。

金聲文驕客非由才。乃其所以無才。故雖如周公不足觀也。聖人豈以一二行掩天下之真才哉。**通篇**主意護才。却看得驕客不當大事。**又**驕客者。無周公之全才。而竊周公之餘才以自美者也。全才不驕不客。餘才自驕自客。餘才易足觀也。哉。纒害道在似是而非。聖人本義。極言驕客之不可耳。未嘗主才說。正爲天下人重視才而輕驕客。故儘其極。至於周公尚不足觀。則才之輕於驕客可知矣。正希意中。只見得才之用大。而驕客之害小。却正與聖義相背。卽謂不驕客乃成其才美。此亦是題後申明之說。非本節語也。如云全才自不驕客。則周公之美。豈餘才哉。聖人此言亦欠商量矣。要之禪學以作用爲性。如婆羅提所

言八出現者。徧該法界。故舉其體爲無善無惡。則其用但有知覺運動。陸子靜得之。尊重精神魄力。故其教極護短才字。凡爲其學者。說內則至於至無。說外則但有極粗之作用耳。惟其於體中打去善字。則用處善從何生。不得已爲世法周旋。善字終成假合。故重才而輕驕吝。正爲驕吝之不可。亦是事理兩障上知解也。王伯安謂蘇張是聖人之資。窺見良知妙用。李卓吾稱曹操馮道爲聖賢活佛。皆是此旨。

子曰三年學章

不至非必不得穀也。無暇分心及此耳。不易得非必無其人也。此世界中難得耳。

科舉種子不好。朱子已歎之矣。或云。古人學慮志穀。今人以學求穀。予謂直是無學耳。時文非學也。今且連時文都弄做不魑魍。

東西那得有學耶。

子曰篤信好學章

陳平語學者苟不明於治亂之故。則亦無用學矣。語倒了。苟不學。則無所當於治亂耳。文世道日更。情變益急。人之處此者。蓋難。語聖人不曾爲此立說。治亂雖異。道不易也。文聖賢奮揚之期。俟時而動。吾嘗觀其遲遲於前。而汲汲於後者。彼固知天命之有在。而時勢不可失也。語漢唐語耳。非聖賢之有道則見也。意中止有漢唐以下佐命人物。極爲刻發。觀托總不出此境界。無他。只在首節之理少理會耳。此章全以首節爲主。

首節

二句平分四件。錯綜互看。更相爲用。

危邦不入節

逢太平盛世誰不彈冠思奮者此不足當則見二字也則字之前
極重難本領有毫釐不足見不得見字之際極輕快本領向來
蓄積無疑到此更不消推敲打點若有毫釐未足也則不得
子曰不在其位章

正爲在位之謀難盡何可出位他謀。

說到謀得縱好亦不是謀而無害亦不是方是聖門喻義之學。
不在不謀合下理當如此而利害在其中啟禎問以山人而橫議
疆場處士而遙持朝政門戶互相掎滅而敗亡隨之出位之謀
其禍烈如此。

羅萬藻文大小要詳所以敘進其局者國家本自有格評後世病
却坐此所以吏治日下格非位之理也。

子曰學如不及章

兩語相生。兩意相足。下句只就上句中鞭緊一步耳。唯其精勤。是生恐懼。唯其恐懼。愈加精勤。一時如此。終身如此。非有前後際也。先輩以上句爲功。下句爲心。亦是照註合說。故截講而意自一串。近日講章。妄分未得已得。真癡人惡夢矣。

兩句總言學當如是爾。玩註中旣字又字。則上句指進取之猛。下句又加儆策持守之嚴。微分次第。無內外之殊也。註恐人作兩節功夫看。故下其心字耳。如不及。亦就其心說。猶恐失固是心。卽有不失之功在。講章分上句屬功。下句屬心。已落支離。孫月峰變而盡歸之心。尤爲混帳。人以爲能脫去講章習說。不知萬曆間以蒙混合。一爲渾融。此正彼時講章習說。未嘗脫去也。必於學字實有所得。看理極真。乃能脫去。

子曰巍巍乎舜禹之有天下也章

古來帝王皆不以天下動心。非獨舜禹也。以匹夫而有天下。自舜禹始。卻無幾微粘帶。此所以爲舜禹耳。

不與本事。歷代聖人之所同。憑空得天下。却是舜禹之所獨。故特舉二聖。只之字而字也。字便見。不然。竟似堯湯文武便不能不與矣。

有天下不與。是聖人所同。而獨舉舜禹言者。正以其未嘗有天下。而忽有天下。尤人所難於不動心也。

有天下而不與。非輕天下之謂也。程子云。今人於醉後。或更加矜持者。是亦爲酒所動也。當知此義。

心有與處。纔有不與處。舜禹須不是一齊放下。毫無罣礙也。看透不與真源。則憂勤腓胝。無非不與之意。

陳際泰文

古之人於天下。知其原無足樂也。其失之也。若釋重負。

則其得之也。若受重負。天下之憂勤與於已。天下之歡娛卽不與於已矣。**評**此意的的見聖。古天子實如是。後世以天子爲極樂之境。那得不貪戀爭較哉。

古之天子。爲天下憂勤。有勞苦而無佚樂。許務之流。畏憂苦而辭天下。是卽與之心也。舜禹有天下。極其憂勤勞苦。而仍是不與。此其所以巍巍也。

金遇之窮也。且又有無天下而與焉者矣。**評**與字錯。所謂與者。以有天下爲樂。此後世帝王之私心。無一不然者也。今要說得高。并將事功都入不與中。不知聖人惟其爲天下憂勤。所以不與。此舜禹孔子之所同也。若以孔子之爲天下萬世爲與。則舜禹之不與荒矣。

若固有之意。正要對若將終身意合看。舜禹讓天下。正要對巢許

一流人合看。視天下如敝屣。正要對無忌無荒。一日二日萬幾。意合看。不然便講這道理不出。

許由巢父正看得天下重。其道非也。四岳等看得天下難。其德不及也。

不與不是絕無干涉。

不與不是輕視天下也。漢武聞不死之術曰。嗟乎。吾視棄妻子如敝屣耳。此亦算有天下不與否。固無論戰爭吞併。純是私意。看巢務薄四海。畸人胸中正多一層沾滯耳。

今人纔說排遣。便是不能排遣。纔說超脫。便是不能超脫。

只見得妙明圓淨本體。如如不動。便是超出三界。此和尚之不與。與聖人毫無干涉。和尚反面。止與庸妄貪癡沉溺者爭較。聖凡不知此正與庸妄同胎共命處。聖人反面。却正與英雄畸士及

和尚等見識爭較是非耳。蓋聖人之不與天也道也。故其不與皆敬畏。異此而言不與皆心也。止是心不與。卻是無忌憚。其不與正看得天下極重。

子曰大哉堯之爲君也章

上節言其德。故曰民無能名。下節指其勲業。正謂可得而名者此耳。仍要牽合無名則天不分德業。一派混話。皆講章不通之說。上節是德不可名。下節乃指可見者斷宜判別。

首節

大哉句統兩節。爲字兼德業。

德有存主者。有潛布者。

德字兼內外說。如所過者化。所存者神是也。粗者說被暨。細者只說心原。扶一邊倒一邊矣。

無能名。不是相忘不言。

只重無名。不重民字。末句只爲無能名帶出民字來。意不在民也。全在民身上做智愚巧樸者。亦癡人說夢矣。

則天無名。不是黃老家玄化無名之道。

無能名。若說做淡忘冥漠。便墮黃老家言。是無名。非無能名也。

此節是德不可名。下節是可見者此耳。明明判分兩項。若此節不握住德字。而兼及政教治道。則下節如何說去。但德字合存主潛布意。止說做玄同默運清淨無爲去。則不可耳。

巍巍乎其有成功也。節

成功文章。自是兩義。將文章併附成功看。便不的。

德不可名。可見者此耳。是功業文章。乃民能名者也。仍歸一無名。是老生常談。

上無能名。指其德之高大深遠。此節指其功業文章之可見如何。此節又仍是民無能名。可見者自有功業文章。無能名者自言其德。原是一順說話。亦何必作反語掉轉。大槩妄論皆起於看註不精細。於是創爲混帳。不分明之說。以爲渾融。真不通之甚者也。

舜有臣五人而天下治章

首節

舜惟以其至德。故能有五臣。亦惟遇至德之堯。故能有五臣。看下
文唐虞之際一句。便見此意。

孔子曰才難節

才難。忽然一歎。不知影落何處。若著虞周。若不著虞周。千古傷情
盡在裏許。

古語才難。是泛言。如末世無人物。衰朝無遇合。此通行議論。聖人所歎。卻從舜武多才際會極盛時。尚且不易得如此難字意。又進一層問。如此則金正希文已深得聖意。而千子以爲不盡比附。何也。曰。聖人心胸大。所歎在古今運會衰隆。世道升降。純是天理上事。正希所見。却止得後世英雄豪傑失路不得志心事。淋漓悲壯。只成自己功利。皆意氣之私。看得聖人一生栖栖。亦止是這箇念頭。發爲感慨。却是絕不相比附處也。

三分天下有其二節

先列舜武兩案。後斷周才之盛。幾於唐虞盡矣。忽稱周之至德。若不相蒙。若有不言之隱。後世遂有疑武王非聖人者。不知有二服事。雖文王之事。而亦武王之心。弔民伐罪。雖武王之事。而亦文王之道。時有不得不然者耳。故不曰文王之德。而曰周之德。

此周字兼武王對唐虞而言。言不獨周之才可以繼唐虞。周之德亦未始遜於唐虞也。

金聲文

云云

文選

本文語意原是贊周德。非謂殷之棄才而周

受之也。贊周德則可以括殷之棄才。而周之私其才。若就才則漏德矣。**註**有二服事。毫不關才說。故外註有別斷爲一章之語。意原從武王事功。轉出文武心事。則用才成治功。自在其中矣。殷亦棄才。周亦受才。却只是以服事殷。如此說何嘗漏德字。但將上文亂臣看做亂殷。則武王之德可議。其十人之才亦只成亂世之才矣。此不特漏德。並漏才也。

不曰文之德。而曰周之德。原從武王得天下。追論至未有天下時。以見周才皆受命於德。此所以足繼唐虞。非謂武專用才取天下。而文以至德不用才也。武王之九人多用於文王時。武王十

三年亦以服事殷只是大業以文王始盛而服事之德亦以文王爲至耳

武王順天應人不得已而爲之聖人之德也文王可爲而不爲聖人之至德也武王牧野以前亦同文之至德後乃迫於時耳不曰文而曰周未嘗除武王也

順天應人武王原未嘗有損於聖人之德但服事時更爲至耳或曰三分以下自爲一章而集註仍舊蓋一幷合說正足以見文武皆聖德而服事之德爲至德兩義並行不悖

陳子龍文周之才如此豈復能行堯舜之事乎固然則唐虞不及周才耶其時義當革耳豈爲才多不可安人下哉文嘗讀書至夏商之際湯有慚德而仲虺作誥以釋之於是乃知革命之事其君不能無愧於心而其臣不然也評虺與湯皆爲天理至道

欲明其義正恐後世如公等誤看故慚之釋之非後世謀篡之私惡也。文已而讀泰誓之章見其上稱文考之顯德下稱羣臣之同心於是又知周之臣久欲代商而文王弗許也。管仲狐偃霸詐之才尚知勸其君以尊王況周之十亂皆文王所簡鍊陶鑄而武王周公繼用之以道德相輔豈可以後世功名之士佐逆造亂之所爲揣測三代賢臣耶。此朱子所以極辨史學之害以其中在心術也。

附孔子曰才難三句文

聖人忽有感於用才之世而深慨古語之有當焉。夫才之所以難在古人亦不自知其言之有當於何代也。夫子有感於所以難之故則見其足以深長思焉爾。今夫言有理至而事不至者存其理而數世之事皆得而證焉。此先見理而後見事者也有事

至而理乃至者。思其事而數世之理皆得而實焉。此先見事而後見理者也。然則得古人之事。思古人之言。此聖人辭先之意也。得古人之言。信古人之事。此聖人意後之辭也。於是乎記者。既列舜武兩朝之才。而遂述夫子之歎曰。吾嘗上下古今而知古今之天下。不恃一才爲之也。而未始不以才爲之也。無一日不生才之天地。無一代不用才之帝王。使生者足以濟其用。用者足以盡其生。則自隆古以迄今茲。將有治而無亂。才之爲才。烏有不足哉。而吾謂誠如是也。則才賤而不足貴。可畏而不足惜。自隆古以迄今茲。亦將有亂而無治。何則。天地之生才也。非治極而將亂也不生。非亂之至也不生。非亂極而將治也不生。帝王之用才也。非治極而將亂也不用。非亂之至也不用。非亂極而將治也不用。蓋天地能生之而不能用之也。帝王能用之

而又不能生之也。故當其治極而將亂也。天地生之而無帝王用之。當其亂之至也。帝王不欲用之。而天地故生之。當其亂極而將治也。帝王欲多用之。而天地且憊惜而不盡生之。若是乎。相需殷而相遇疎。則何也。非天地愛才而有生有不生也。非帝王棄才而有用有不用也。有用有不用者。氣運之所以開。有不生者。氣運之所以定。天地不得已而生。帝王不得已而用。知其不得已而用也。則生之者益少。知其不得已而生也。則用之者益慎。吾今而知才之爲才。其不數數見也。雖天地無如何。雖帝王且無如何也。然猶以爲未嘗生。生則不可量也。以爲未嘗用。用則不勝計也。而又有異焉者。亦旣生之。亦旣用之矣。當其時。都兪颺拜。何如其隆也。奔奏先後。何如其衆也。由今思之。而以爲異焉者。且不獨由今思之。而以爲異焉也。在昔先民有

言曰才難斯言也。其有感於治極而將亂者耶。其亂之至而致思者耶。其亂極而治而以爲不易得者耶。是殆未見夫天地帝王旣生且用。而猶有未易者也。然且其言之咨嗟愛惜顧慕而遠望焉如此。使其較量於都俞颺拜之時。考論於奔奏先後之內。吾不知其咨嗟愛惜顧慕而遠望者。又當何如也。卽以彼所言思我所見。信乎否乎。不其然乎。

子曰禹吾無間然矣章

禹與堯舜之聖同。堯舜較大。禹較精嚴。其分際正在此耳。無間只是事事恰好。註所謂各適其宜。正見其心法之密。動容周旋中禮。非盛德之至者。不能纖微都到也。

無間。只事事中節合宜。非有奇異也。

禹只是一箇完密之禹耳。

禹只是箇禹。不曾爲有間處。脩籬補漏。其無間亦不在此零星件繫也。聖人極意形容其心法之密。到此盡處。都見全身耳。人能刻毒說問字。不能微妙說無字。

無暇論及間。正是不足處多。

人主渾純闕失。其大者尚推勘不得。何暇及間。求至於間。則全體已無可議。只在細微盡頭處。或猶有毫髮之憾乎。而其無間如是。乃見其至。

只在細近處說問字。益見神禹之難。

問字是吹毛求疵意。

問是後人吹求。從吾字生來。不從禹字生來。

問字在尚論者看。方是求問然於禹。

問是搜求罅隙之謂。故曰吾無間然。不是禹無間然也。吾字不是

閒字。

無間然者。言一無可議也。與連得閒矣之間同。正在事端上說。不指心也。心之有閒無閒。如何見得。惟其事端之顯易細微處。無一可議。則其全體大用之精密可知。歸本心源。是推進一層語。只好在末句中說。非首句閒端意也。

問然若說向心體上。則是疑焉。非聖人而可也。但是事爲之末。四面八方。比較將來。有絲毫不闕。苟縫處。雖無傷於聖人全體。然已得閒矣。如此看。方是求聖人之閒然。

無間然。正說聖人盡頭處。不說聖人根本處。時文求深。反看得聖人低矣。

三段是隨舉事件。無不可以見其全體之精密。無閒不專在此三段也。

禹之無間。其神理在三箇而字中。

吾聞至禹而人主之富始可自樂。禹雖傳子。然封建公天下。仍唐虞之舊。何云始可自樂。若可樂。則堯舜樂之久矣。此等議論。只滿腹貨利娛樂重耳。

首末二句文法雖一意。卻不同。首句是從全體大段說。末句從三段推勘極致而深歎之。非複衍也。